

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1951 del 30/06/2023

Traduzione in mòcheno

“Trentin no filter - de kultur ver di”: nai kontest ver de jungen

“Trentin no filter - de kultur ver di”, an nai’n konkurs pet prais ver krativ jungen, ist kemmen vourstellt en pfinsta as de 22 van prochet ka de Sala Belli va de Autonome Provinz va Trea’t. De kontest geat au ver za gilt n de raich ont de tiaveket va de trentinerkultur pet de sproch as prauchen zan maist n de jungen: de sèll van social media. Piabler ont diarndler as hom zbischn de 18 ont de 24 jor ont as plaim en Balschlònt meing toalnemmen ont schicken èppes gadrukt as TikTok, Instagram oder YouTube as boast derstell n de Trentinerkultur noch sèll as de sechen sei. Men kònt schicken letratn, video, karosell n ont stories van an iatn pahalter va lokalkultur: van platz va art finz en tònzn, va de gschicht finz en de projektn, van teater finz en de lait. Men muast schicken òlls iberenn de 25 van agst 2023. Der projekt ist enviretrong van asesor va deschual, va de universitet ont va de kultur, Mirko Bisesti, as hòt tschickt en de druck konferenz an video va gruas van Dipartimento va de schual ont kultur, van dinst va de attivitet ont kultur va de autonome Provinz va Trea’t.

S kimp regiart zòmm pet en Trentin Fil Commision, va Trentino Sviluppo ver de television, zòmm pet Trentino Marketing. Men kònt gabingen secks prais en gèlt finz as 2.500 euro ver de earst n. Men mu vinnen Verregl ont vurm ver za innschraim se as sitz trentinofilmcommission.it.

Der kontest “Trentin no filter - de kultur ver di” klòfft en de jungen as billn drinn gea’ en de trentiner kultur ont as billn sa derbischn pet oa’zege social as pòcken.

“Der doi konkurs - sok er der provinzal asesosr ver de schual, de universitet ont de kultur, Mirko Bisesti - ist a moglechket ver de jungen ver za prauchen de krativitet pet post, stories oder video reel abia an ausònder vurm ver za kontarn de kultur en Trentin. S ist, mear as nèt, an innlon ver za kennen de kultur ont dòra ist an vurm ver za lòn g sa kennen gor en bem as kennt nèt òlls”. “Trentin no filter - geat er envir der Bisesti - billt gilt n de haitzegento kultur za bundern de jungen, za mòchen sa pasuachen ont za mòchenen kennen òlls sèll as sei denken as ist de kultur van Trentin”.

De vurm ver za mòchen toal sai’ kemmen vourstellt va de **Alessandra Schiavuzzi**, viarer van Dinst attivitet ont produzion va de kultur va de Provinz, ont **Luca Ferrario**, viarer va Trentino Film Commission. “ petn bando - hòt kein der Schiavuzzi - billt men mòchen auserkemmen sèll as tschbinnen de jungen as prauchen ober as mòchen ont mòchen kennen de kultur ont de projektn van doi summer”. “S bart schea’ sai’ - hòt untestitzt der Ferrario - za sechen abia as de jungen pet de sprochen as de kennen barn klòffen va bos as de tschbinnen va de kultur”.

Men sok nèt de beiln plinder as men muast prauchen ober bos as men muast drucken ist drinn en verregl, abia “Feed Post va Instagram pet karosello va almen 3 letratn pet de geolocalizzazion ont tag van bichtestn borekaitn as kemmen innganommen” oder “video Tik Tok nspirational (max 20 sec in formato 9:16) pet liad trending va de piattaforma ont tag van bichtestn borekaitn drinn en video”.

Òll naia idea bart miasn hom zòmm a copy ver za leing aus en rècht vurm ont muast sai' patschrim der avai as de ist kemmen tschbunnen.

De toalnemmer barn sai' toalt en zboa gruppn: 18-20 jor ont 21-24 jor. Ver an iatn de kommission bart song ber as hòt gabungen. De earstn van zboa gruppn barn gabinnen 2.500 euro ver oa', de zbaitegen barn krieg 1.500 euro ont de drittegen 500 euro. Men bart song ber as hòt gabungen ont gem de prais as de 14 van leistungst 2023.

De vrong ver za toalnemmen meing kemmen tschickt finz um 17.00 van vrait as de 25 van agst 2023, petn formular online as ist ausgaleik as de sitz van Trentino Film Commission www.trentinofilmcommission.it.

Pilder ont vrong gamòcht van Druckomt

Mearer nochrichtn as: www.trentinofilmcommission.it

Der asesor Mirko Bisesti

<https://www.youtube.com/watch?v=CEMPzjFv800&t=6s>

De viarer Alessandra Schiavuzzi

https://www.youtube.com/watch?v=mV_kmJOFoK4

De vourstell

<https://www.youtube.com/watch?v=4i3DJ8LWWrs>

Link ver en download

<https://wetransfer.com/downloads/09016bdddabc238541d522488a126ce5020230622131635/ab8949f349d0b10>

Ibersetz gamòcht van Sprochtirl va de Tolgamao'schòft Hoa Valzegu' ont Bersntol

(cdt)